



OLE SULU SAMOA

EKALESIA FAAPOTOPOTOGA KERISIANO SAMOA
OLE NUSIPEPA FAA-LE-LOTU NA FAAVAEINA I LE T.A. 1839




FAAVAEINA 1839

OLE SULU SAMOA

FEPUARI 2023

Email: sulusamoa@cccs.org.ws - Main Office: Ph. 24414, Ext 30 - website: www.cccs.org.ws

MALUMALU FOUEFKS PATAMEA



FAASINO UPU

1. O LE LAUGA	2
2. A'E KOLISI FAAFAIFEAU MALUA	4
3. MALUMALU FOU EFKS PATAMEA	5
4. NA O AFIOGA E TULEI MAI	6
5. O LE PEROFETA MULIMULI	8
6. O I LATOU UA MALILIU	12
7. AUE! UA MALILIU TOA	15
8. ATA O E UA MALILIU	16

O LE LAUGA

Tusi Faitau: F. Tuai: Iosua 2: 8 – 11;
F. Fou: Iakopo 2: 14 – 26.

Matua: Iakopo 2: 16 – 17, “¹⁶*A fai atu so outou ia te i latou, “Ina o ia outou ma le manuia, ia mafanafana, ma ia maoona,” a ua lē foai atu ia te i latou ni mea e tatau i le tino, se a lona aogā? ¹⁷E faapea foi le faatuatua, pe afai e lē i ai galuega, e mate lava ia ina ua na o ia.”*

Manatu Autu: Faatuatua o loo galue.

O le a taoto pea ia faamaene o tailoloto, paia faa-aposetolo o le tusitala o Iakopo. Tainane foi le mammalu o le aiga faa-ta’ape’ape, na faa-savali ai lenei lomiga. O outou sa ma faigā, e i ai le manatu ua mae’ a paelago, i sauniga o le vайасо; e lē toe oo i ai se upu. E lē vaea foi le fala ‘o’oto i le matua ia Paulo, ma lana a’oa’oga i le faaolaina o le tagata i le faatuatua, aunoa ma galuega. E i ai le talitonuga, e lē mala ese inā, mai le mau a le uso nei; e ui ina foliga feteena’i, a e leai; o itu lava e lua, o le tupe siliva e tasi.

A ou te fia pi’iama i le matalalaga, o loo mamanu ai lenei Tusi, aemaise le autū faasinotonu i lenei aso – O le faatuatua ma galuega. Ia o faatasie le futia ma le umele. O le tumu taumasuasua faaleagaga, ia sasa’ a mai i fafo, i galuega faatino. Pe faapea foi, o le

faatuatua i le Atua e lē vaaia, ia faamaonia i galuega alofa, e fai i le uso tuaoi o vaaai atu i ai. A talatala pea, o lona uiga, o le atamai ma le a’oa’oina i le loloto o le mataupu silisili, le maoa’ e o faailoga ma tusipasi, o le masausau o le laugaina o le Upu; ia sili ona leo tele mai, i amio ma galuega lelei e molimauina. Auā pe afai e lē o lea, ua na o se apa memea taalili, ma se sumepalo tagitagi, e leai sona aogā, o se faatuatua mate. O le Sami Mate o le Sami Oona lava lea, auā na o lona talia o vai mamā mai le Ioritana, ma taofiofi ai i totonu, a e lē tafe ese i fafo, ua avea ai ma faaputuga o vai oona ma mea mamate.

O loo atagia i le atumatagi a le aposetolo, le tulaga maulalo sa soifua ai soo o Iesu, o lana Ekalesia. Tuu ia sauaga ogaoga mai le lalolagi o Iutaia ma Roma i fafo atu. A o lo latou lotoifale faa Kerisiano, sa maitauina ai le matavale o le ola faapito, vaaai maulalo, manatu faatauvaa. O le tino o Keriso e lē paleni ona itutino, ona o le lē alofa, lē amiontonu. E mafuta, tatalo ma anapogi faatasi. Ona taape lea, foi le tagata mau’ oa, filifili ona la’ei e mana’ o ai, totoe ma faamaumau ana taumafa, a e foi le mativa masaesae ma le matelaina, e aisi solo i maketi ma magāala. E soo tulutulu, pipii tia, a e mamaao lava le fesoota’iga. O le feau a Iakopo mo le au faatuatua lima malolosi, e lē o nisi i latou nei, a o uso ma tuafafine moni. O ivi, aano ma le toto o Keriso, ua tino e tasi ai i latou. Se ā le lelei ma le matagofie o le nonofo faatasi o uso? E aumā ni tatalo, ma faamanuia atu, a e leai se tino mai? O galuega, o molimau ia o le faatuatua, o le tino vaaia o le alofa faamaoni faa Keriso. Sa i ai tu ma aganuu masani faa Iutaia, sa lima taitaiina ai le fesopoa’i ma fetufaa’i o meaalofa a le Atua; a o aganuu foi ia, sa fai ma ufiufi o le faa-faresaio, faafoliga a e mata’ū, ma lima-mamau. Ua ta’u atu e le aposetolo, o a faalagiga o faalupe ai i o latou ituaiga taitasi, e ao ona faa-taalolo, faamuamua tofiga faale-faatuatua, i le faaolataga ua faia e Keriso. Ua si’i mai e le aposetolo faataitaiga e lua mai lo latou tala faasolopito, e lagolago ai lana mau. O le faatuatua o Aperaamo, ma le faatuatua o Raava. O le faatuatua mai le itu o tane, faapea ma le inailau a tina. O se faata’ita’iga mai le ta’ita’i lauao sinasina, ua afu lelea le faatuatua, a o le auga tupulaga sa le’i tofo i le pologa i Aikupito; ma se vaaiga i le talavou tautua tuāvae, i le osoosoga o lona faatuatua tau amata, a o savalia le ala o le saolotoga. O le Isaraelu faamaoni le tasi, a o le tagata nuu ese le isi, ua fia Falealili fua. A e tau fai tutusa, i galuega faatino na

fa'aalia ai le malosi o le talitonu i le Atua. O Aperaamo, e lē tasi se galuega na fa'aalia ai lona faatuatua, ma ta'uamiontuina ai. Na la osi feagaiga ma le Atua, na folafola i ai tofi ma faamanuiaga sautualasi, e fai mo ia, ma le nuu e tupu mai ia te ia, tainane aiga uma o le lalolagi. O faamanuiaga o le taimi nei, ma manuia e faavavau. O nei folafolaga uma sa taunu, i le faamaoni tausi feagaiga o le Atua, ma le faatuatua o le tagata, sa tali atu i ai, e ala i lana amio lelei, ma galuega lelei na faatino.

A o le feau faapitoa, e tulaga ese ai le faatuatua o lenei auauna, o le ofoina atu o lona atalii o Isaako, e osi ai le taulaga i le Atua. Sa le'i finau Aperaamo, na te le'i fesiliglia le lavelave, i le sa'o pe sesē, o le poloaiga a lona Matai, pe na fai muamua foi e se isi lea mea pe leai. E sa i lona va tapuia faale faatuatua, ma lona Atua. E ui ina sa tuia lona fatu i le tiga, a e na fai lava ma le usitai, na inu i lona 'o'ona, ona sa talitonu, o le Atua na aumaia muamua, na te toe aumaia foi faalua e sili atu.

O le faatuatua ua mu, a o faatino faiga a isi tapuaiga na si'osi'omia ai o ia. Na ia vaai o ave faapolopolo o atina'e, o manu pepeti, e oo i pologa ma auauna, a tagata sa Kananā, e osi ai a latou taulaga. Na ita le loto o le tagata saili malo, na faaosofia e fai se taulaga e sili atu, o la'e i mo lona Atua. Na ala ai lona lē manumanu, e ave le mea aupito faapelepele. A o lona talitonuga foi, o le Atua, e ana le meatotino; o ia ua na o se tausi mea. E manatua pea lea ta'ita'i, i lona faatuatua galue, sa faamaoni e oo ina valaau le Matai, sa le'i ta'uleagaina lana tautua.

E tasi le mea na fai e Raava, ua ta'ua ai lona faatuatua. Na ia faalogo i le 'a'ave mai o tala i le mana o le Atua moni, ona mata'u lea ma talitonu, a e lafoai atua faapaupau o Ieriko. Na fai le galuega alofa, na ia tanumia faa-tagata oti auauna a Iosua, na ia toe susu'e ese le ufiufi, tuutuu ifo i lalo, faasao ma faasino le ala, a mavae po e tolu, ona o lea ua saogalemu. O le galuega na lamatia ai lona ola, na ia tete'e ma 'olegia le tupu, ona o le alofa ia faasaoina tagata o le Atua. Na i'u i le faaolaina ai o tagata e toatele – o Iosua ma le itu'au a Isaraelu, o ia foi ma lona au aiga uma. Ua sili le fafine ese na faalogo, ma faatuatua loa; nai lo Isaraelu a'ia'i na vaai tino i wavega e tele, a e lē talitonu. O le faatuatua foi e o faatasi ma le salamō, auā sa talitane, a ina ua sui lona Atua, sa muamua sui lona olaga, o le Raava fou; o le maea fu'a mūmū na agiagia, e faailoa le faaolataga tele, ma le manumalo o le itu'au a le Alii. O lona

matūpalapala, e fai paolo i le aiga paia, ma tau lona gafa i le Faaola. Faatuatua o loo galue.

Le paia o le Ekalesia ma le au faitau Sulu Samoa EFKS, aemaise le aufaigaluega totofi a le Atua, e lē fesiliglia lou soifua tautua, e le gata o le galuega faa-aposetolo, le tausiga o le lafu mamoe ma le folafolaina o le Upu, a o au galuega tetele faatino. O lou faatuatua i le Atua, e ala i le Aulotu o galulue ai, ma le Matagaluega o faamemelo i ai. Ua lauiloa lou afu sisina ma lou ma'au faa-EFKS. Ua sauni foi le Faamati, le tausiga o le Fono Tele, e faasolo se'ia taualuga i au Faiga Taulaga o lenei tausaga. O galuega faapitoa, e faaopoopo i le tautua masani o aso taitasi. E lē selu atu, a ua e faia mea silisili ma e manumalo ai, ia fai ma viiga o le Atua.

A ua toe fafagu mai le feau o le Tala Lelei, i lou soifua saili malo ma fai mea sili, ina toe teuteu atili, saga faalelei atili, ina ia fua tele mai atili, faateleina ai le viiga o le Alii. O le fili o mea sili, o mea lelei, ina ua fai ane ua lelei, ua lava loa. Leai, galue faasili. *On te fesili ifo lava a'u, pe mata o le tausaga lenei, e ausia ai le Miliona Tala o Faiga Taulaga Samoa a nisi o Matagaluega, aemaise la'u Matagaluega pele o Faleata? Ona ou toe tali lava lea, amata ia te oe, fai lelei lau oe taulaga ia tele se faasiliga, 'aua ne'i pa'ū, 'aua le afaina fua lau taulaga masani ona o nisi galuega faaopoopo, pe fai faanoi i le tau o le soifuaga, faama'i ma isi faalavelave. Atonu o le a taunu ai lau moe vavale.*

O le faamanatu a Iakopo, ina ia tuu pea ia o faafitauli mai fafo atu, i aafiaga o faiga faapolotiki o faiga malo ma ona upu fai, tainane le fetaomi mai o le mau tapuaiga eseese o si'omia ai tatou. A o lo tatou lava lotoifale faa EFKS, ma le valaauna e fai ma faaola i tagata, e ao ona toesilasila toto'a i ai. Aua ua iloga i latou ua faula'i ai mea, ma i latou ua tau saili sina mea, pe a potopoto le Ekalesia. Fai ma faataitaiga pe a potopoto i faalavelave fai, e faatino ai le aganuu. Ua manino le le paleni, ma ua tausuai ai le faatuatua.

E ao foi ona faautauta lelei, ina ne'i o tatou fa'aoga sesse lenei a'oa'oga i le faatuatua galue, e ufiufi ai le matape'ape'a ma le tu'inanau, o le mana'o lasi i mea o le lalolagi, e i ai measina a le atunuu ma ana fa'aaloalogia. O le faatuatua galue, e ao ona faatonutonu lelei e le faatuatua atamai e fetuutuuna'i i mea e tatau ma mea e tuu. Ne'i faamamafa lenei a'oa'oga i o tatou tagata, latou te ola pologa ai i le sailiga o mea latou te le gafatia. *Pe le o ona po nei*

ea, e tatau ai ona taofia e le Eklesia, fa'aalolaoga faale aganuu i ana faalavelave fai? E pei o Faamati, Felaugaiga, Osiga Feagaiga, Faapaiaga o Malumalu ma isi Galuega a Aulotu, Pulega ma Matagaluega? A o se amata mea foi lea i le faamama avega, i nai aiga, e tau faatofu le mamalu mauluga faalupe o le Eklesia? O le a se afaina, pe a fai na o le faa Kerisiano, i le na o se taumafataga, ma sina meaalofa tupe/pasese itiiti. Tuu ia le Toga ma Palapala malo!

Ne'i faapea ane, o loo ave le fa'aaloalo ma le faaeaea i faauluuluga, a ia manatua o Iesu na ave lana faamuamua i e matitiva. Afai ua a'oa'o mai Iakopo sa ta'ita'ifono i le Ulua'i Eklesia i Ierusalem, aisea e le mafai ai e o tatou ta'ita'i, o le Fono Tele ma le Komiti Au Toeaina, o tupu ma tamalii o le atunu i A'oa'o Fesoasoani ma Tiakono, ona mulimuli ma taulamua ina ia fesoasoani i le mativa o tagata lotu? O oe lava le Peteru na tuu i ai e Iesu le ki ma le tatala o suiga fou, suiga lelei, e tusa ma le musumuga a le Agaga Paia faatupu mea lelei. Pe le o le uiga foi lea o le mataupu o pepese ai pea, o le Tala Lelei na te teuteua ma faatala lelei le aganuu? A e a le fetalaiga a Iesu, "Ia outou o mai ia te a'u, outou uma o e tigaina ma mafatia i avega... " ?

E lē aveesea lava lo tatou va tapuia, le va fealoa'i fa'aaloalo; a ua faamanatu mai e Iakopo, ne'i malo mai mana'oga faalelalolagi, i lo tatou valaauna sili, o le tino vaaia o Keriso i le lalolagi, ia faamuamua, tausi faapelepele, ma ola ai. Ua 23 tausaga o le meleinuma fou, ua tatau ona amatamea le EFKS i ni suiga tetele ma le lelei, o le soifuaga o tatou tagata, ina ia atagia ai le faaolataga na faia e le Keriso Faaola. O galuega na fai e Aperaamo ma Raava, o nisi o galuega faa-valoaga, faasino i le galuega silisili, na faia e Iesu Keriso lo tatou Alii. Ilona maliu i le satauro, ma lona toetu manumalo. Na taofia e le Atua le lima o le tamā, ia 'aua ne'i oo i le atalii. A e na te le'i faasaoina lona lava Alo pele e toatasi. Na faae'e o ia i le fata faitaulaga o le satauro, e osi le taulaga e faamagalo ai tatou uma. Na tanumia, mavae aso e tolu, pei o le tala i auauna na tanumia e Raava, na toe tu manumalo ai Iesu. O le faaolataga mo i tatou uma, pe afai e salamō faamaoni, ma faatuatua atoatoa ia te Ia. Ia tumau i le Atua le viiga. Amene.

(Saunia e le Faatonu Sulu, e sui ai le lauga na atofa mo le masina. O se vaega o le Lauga i le Tofiga Aufaigaluega Toeaina ma Faifeau ma Faletua, Matagaluega FALEATA).

A'E LE KOLISI FAAFAIFEAU MALUA

O le Aso Lulu 8 Fepuari na faia ai le Sauniga Lotu ma le Talisuaga Paia a le Alii, e fa'aa'e ai le Kolisi Faafafeau i Malua mo lenei tausaga 2023. O le sauniga sa faia lava i le Fale Iupeli, na ta'ita'iina e le afioga Taitafono Komiti Au Toeaina /Komiti o Malua, susuga Asotasi Gu Time FT. O talosaga na taitaiina e le susuga Aila Patea FT (Vaimauga), o le Tusi Paia na faitauina e le susuga Auvaa Peseta FT(Apia), a o le susuga Pouniu Faamausili FT (Aukilani) na saunia le Lauga na faoopoopo i ai ma le upu a le ta'ita'i. E to'a 28 A'oa'o na faamanuiaina i le su'ega ulufale, o i latou sa faia le Ta'utinoga i le amataga o le tausaga i luma o le Komiti a Toeaina Faatonu. Peita'i e to'atasi le A'oa'o ua tolopo atu lona a'e i le Kolisi i le tausaga fou 2024 pe a aulia i le alofa o le Atua. O le faasologa o galuega a le Kolisi i lenei tausaga:

13 - 17 Fepuari: Vaiaso o Tapenaga, Faamautu i maota, faamasani ma tofiga i aiga o faiaoga, resistara & pili a'oga, (o le vaiaso e lauiloa i lona ta'u 'o le vaiaso u'amea', faasino i le tapenaina lelei o le laufanua, faatoaga ma lafumanu, le si'osi'omaga o le Laumua).

20 Fepuari: Amata A'oa'oga (Ia silafia o le tausaga lona lua lenei o le Faailoga o le Matuaofaiva o Mataupu Silisili (Master of Theology).

18 Mati: Faau'uga a le A'oga Tusi Paia a Malua.

7 Aperila: Aso Maliu, 9 Aperila: Aso Sa Toetu (O le Tuuaga muamua lenei o le tausaga, o le ulua'i Faamuli foi lea a le Tausaga Muamua, latou te tofo ai i lea foi vaega taua o le a'oatauina ai i totonu o le Laumua).

5 Me: O le Tuuaga mo le 4 vaiaso, a o sauni mo le Fono Tele.

2 Iuni: Toe a'e le Kolisi mo le Kuata lona lua.

26-30 Iuni: Su'ega Kuata Muamua

3 Julai: Amata mataupu Kuata lona lua.

11 Aokuso: Tuuaga Kuata lua (mo le 2 vaiaso).

15-16 Aokuso: Suega Ulufale 2023.

21-24 Aokuso: Mafutaga Faafouina Aufaigaluega.

30 Aokuso - 1 Setema: Fono OBSA (Oceania Biblical Studies Association).

11 Setema: A'e Kuata Tolu

9-16 Oketopa: Malologa Lotu Tamaiti (O le Faamuli faai'u a le Vasega Faai'uaso).

13-17 Novema: Su'ega Faai'u o le Tausaga

25 Novema: Lauga Togi, Faauuga, & Faamanuia.

FAAPA'IA MALUMALU FOU EFKS PATAMEA

O le Aso Faraile 24 Fepuari 2023 na faapaiaina ai le malumalu fou o le EFKS Patamea, o le Matagaluega Itu o Tane. O le Toeaina o le Pulega Gaga'emauga, susuga Palemia Tauiliili Reupena FT na taitai le sauniga, na faatumulia i le mamalu faale Tala Lelei i susuga Toeaina o le Matagaluega, susuga Tanielu Apineru FT & Seataata o le Pulega Gagaifomauga, Amuia Seuala FT & Tiresa o le Pulega Itu Asau, ma faafeagaiga o le Pulega ma le Matagaluega. Sa auai foi le paia faale-malo i tofi faipule o lea itumalo, le afioga Sui Palemia Hon. Tuuala Ponifasio ma Hon. Laaulialemalietoa Leuatea Polataivao Fosi, faapea le mamalu o aiga ma paaga a le faafeagaiga taulagi ma le faletua, susuga Tanielu Tupuse FS ma le faletua ia Tuvalu.

O le afioga Taitaifono Fono Tele, susuga Tunumoso Soliola Iosia FT, na ia ooti le lipine e tatala aloaia ai le galuega matagofie, ona tatala lea o faitoto'a se'ia ulufale atu le mamalu o le faapotopotoga faatuatua. O ia foi na saunoa fai ma sui o le Eklesia Aoao, ma le Komiti a Tama o le Eklesia e faaleo le faamalo ma le faafetai i le faafeagaiga ma le Eklesia, mo le soifua faatuatua ua tino mai i galuega tetele. Na ia faafetaia le susuga faafeagaiga ma le faletua, le Eklesia ma le afioaga i tamalii ma failauga, faletua ma tausi ma le nofo a matafale, e fai ma viiga o le Atua lo latou afu sisina. Malo le galulue. E faamanatu pea, le fa'aaoga tatau o malumalu e alu ai lo tatou malosi - le o ni maota e teuteu faamatagofie ai aai ma afioaga, pe faamanatu ai nisi, a e mo le soifua tapua'i i le Atua e ala mai ai manua.

O lena ua silafia, o le malumalu tuai na faatama'ia i le malaia i le aso 7 Ianuari 2022, o se faalavelave matautia mata o le a faavaivaia ai le soifua tapuai, a o le tautua lotu a le toatele. Sa manatu foi o le a liu lotu ai nisi, peitai sa leai lava, a e sa tumau pea le faatuatua ma le onosai o le Eklesia a Keriso, sa loto tetele pei o Neemia e toe ati a'e le malumalu mo osiga taulaga i le Atua silisili ese. E 6 masina talu ona tuana'i le faalavelave, na amata ai le galuega o le malumalu fou, i le aso 7 Julai 2022. E 8 masina na faia ai le galuega e le afioga i le Matuaofaiva ma le Falefa o le Aiga Salemalama, lea na mae'a i le aso 23 Fepuari 2023 ma faapaiaina ai.

O le Tala o le Galuega sa saunia ma saunoa i ai le susuga ia Tanielu Tupuse FS, e otooto atu faapenei:

ALAGATUPE FAATINO AI LE GALUEGA:

(1) Leitiofoni	-	\$421,797.00
(2) Tusi Aisi	-	\$55,229.90
(3) Meaalofa	-	\$63,936.10
(4) Sene/Lafolafoga	-	\$67,948.79
AOFAI	-	\$608,911.79

TAUOFOGA*	-	\$77,854.70
-----------	---	-------------

AITALAFU O LE GALUEGA:

Blue Bird Lumber	-	\$580,000
Toomaga EFKS	-	\$50,000
Au Kamuta	-	\$28,000
AOFAI	-	\$658,000

TAU O MEAFAITINO/MEAFAUFALE o le

Galuega	\$1,016,757.79
Totogi o le Au Kamuta	<u>\$231,000.00</u>

TAU OLE GALUEGA:\$1,247,757.79

*** TAUOFOGA:**

1) Moli, Ili ma mea tau uila/eletise - (Agaiotupu & Meana'i, Lauano Ausage & Silia & Fanau)	\$20,000
2) Pulelaa (Faifeau Toeaina, Selulo Lagoo FT & Faletua, & Lauano Neemia & Fanau)	\$10,094.70
3) Faitoto'a Tele i Luma (Tumama & Fanau)	\$6,800
4) Faamalama Tele i Luga o le Pulelaa (Alo o Faaui & Mema)	\$3,600
5) Ea Malulu & Moli o le La (Air & Solar Lights - Faia'oga & A'oga Aso Sa)	\$27,440
6) Laulau Faamanatuga & Nofoa (Tuaena Masei & Elena ma le fanau, Lucy & Auauna	\$6,920
7) Ipu Faamanatuga (Tina ia Feagai ma ona alo)	\$3,000
8) Pulelaa Tioata (Temukisa Tuuala Mauluulu & Fanau)	-
AOFAIGA TAUOFOGA	\$77,854.70

Faafetai:

Rev. Tanielu Tupuse
EFKS Patamea

NA O AFIOGA E TULEI MAI ONA FOFOGA.

FAATAUTAIGA O TĪGĀ O LE SOIFUAGA NEI

(1) “⁴*o ona po e taufaitagitu’i ai, ma ona po e sasa’ a ai.*” Faila.3.

E lē gūgū, pe faaitiitia, pe lē amanaiaina e Afioga paia a le Atua, le moni o matuitui o tiga o le olaga nei. E i ai le aso ma le taimi tatou te lagonaina ai le tiga tutui o to’atūgā, o mala ma puapuagā, o mea faapelepele e fāoa ma leiloloa o le olaga, e pei o gasegase lē matogafititia, o le soifuua ua afu, faafualoa ma fai ifo, o le maliu ma le oti, o teteaga ma mafutaga malepelepe, o sauaga ma faasalaga, o aitalafu ma faalētonu tau tupe, faamalologa ma aafiaga o galuega, faalavelave tutupu faafuase’i ma le tele o isi mau faafitauli e taufaitagitu’i ai. O aganuu o aso nei latou te saunia i tatou mo faasiliga, a e lē o le faaitiitia; ia sivasiva ma saasaa i le fiafia, a e lē o le tagitu’i i le faanoanoa. O pelega e māumāu ma misia, latou te tuu i tatou i nofoaga lē faailogaina.

O le mea lea, e tatau lava ona tatou malamalama i tafa eseese o tatou tiga ina ia fesoasoani ai e toe faatulaga ma toe faafoi i tatou i le soifuaga sogalemu e tatau ai. O le gaogao e afua ai fesuiaiga o le olaga, e amata i lagona o le faavauvau – le lagona tiga ma le oona i le iloa o se tagata po o se mea tāua ia i tatou ua sasae ese mai lo tatou olaga, ma ua tuua ai i tatou pei ua gaoia ma fāoa. Ona sosoo ai lea ma le faanoanoa – le isi laasaga o tiga tutui o le loto ma le mafaufau e masani ona fuiifulua ma le ita, vaivai, fememea’i ma le leai o se malosi ina ua aunoa se fesoasoani. O le isi laasaga o faanoanoaga e agai i ai o le tagi tautala, faaleo, faamatala ma faalauiloa lo tatou mafatiaga. O le laasaga faigata lenei, o le maligi o loimata, toe manatunatu ma manatua aso o le mafana o mafutaga, moomooga toe fia maua mai, ma luluina ai i tatou i le matuā faanoanoa tele. Tatou te lagona le salamō ma ta’usalaina i upu ma faatinoga na fai, pe sa tatau a e le’i faia.

O le nutimomoia o tatou loto ua avanoa ai isi tagata latou te tali mai, e ofoina mai fesoasoani i faamafanafanaga ma faaloto tele e manaomia ina ia amata le galuega o le faamalologa mo tatou manu’ a. O faiga faavae ia a le Atua lo tatou Tama, mo le faamaloloina o loto nutimomo. O le 120 tausaga o Mose, le ta’ita’i e pele i loto o Israaelu, na ia maliu ai, a e tuua ai le malo loto faavauvau ma nutimomomo (Teuteronom 34). Na tuu i ai e le Atua aso e tolu

sefulu latou te faanoanoa ai ona o la latou tete’aga ma lo latou ta’ita’i, ma ia faamafanafana le tasi i le isi, a e latou te le’i toe fa’auau i tiute masani o le olaga. O le mea foi lea, e talafeagai ia i tatou ona tatou faatino faanoanoaga ina ua leiloloa pelega mamae, auā o Iesu lava ua fetalai mai, “⁴*Amuia ē faanoanoa; auā e faamafanafanaina i latou.*”

Mata.5.

(2) “²*o ona po e fanau mai ai, ma ona po e oti ai.*”

O le au su’esu’ e i le Matātā o Faanoanoaga i Kolorato, Amerika ua latou ofoina mai le faasologa o fasitepu e 4 e mafai ona taunu ai i le toe faaleleia. O le laasaga muamua (1): O le Segia o le mauli po o le Faate’ia. O le ulua’i tali lava pe a faate’ia i se faanoanoaga, o le lē talitonu ma le teena o le mea ua tupu. “Ou te lē talitonu ua tupu lenei meal!” E faalogoina le pē atoa o maso ma musele o lagona, o se faalogona faalenatura o le tagata na foafoa e le Atua pe a oo mai tulaga ogaoga e faate’ia ai, na te puipuia ulua’i tu’i ma ta, ma aumaia se avanoa ia lava e tapena ai tatou ia gafatia ona faafetaia’i le mea ua tupu. O lona lua (2): O le Faatu’iese. E lagona le ita ma le to’atama’i pe faali’i i le Atua, a e toe lagona foi le sesē ma le agasala i lo tatou tuua’ia o Ia i mea ua tutupu. E mafai ona tatou tuuaia i tatou, o foma’i po o le gasegase ma fesiligia le alofa ma le faamaoni o le Atua, e oo lava ina tatou fefataua’i pakeni ma Ia. ‘Afai e te faia tau lava o se vavega e toe faafoi mai ai o ia, o le a ou...’ O le sitepu lona tolu (3): o le Faata’ape’apeina. E pei o le pese a Asuao, ua masofasofa ua malepelepe sootaga. O le ituaga soifuaga na tatou masani ma fiafia i ai ua matuā faaleagaina. O mea sa miti i ai ua liu ausa. Ua lagona le leai o se faamoemoe, leai se malosi, ma ua leiloloa i se lalolagi gaogao. Ua alia’ e isi mea leiloloa: o le tamaoaiga lē matonu, o agafesoota’i faataapeapeina, lē mautū lē mautonu, ma isi laasaga faafatiatama’i. Ua fai a tatou faai’uga e lē toe tutusa le soifuaga, e lē toe lelei. Tatou te sao mo sina taimi puupuu, a e lagona le fefe e iloilo le auala o i lumāmea. O le laasaga e fa (4): O le Toe Faatulagaina. O le faanoanoaga pule malosi e fai fai mālie lona suia i le umi e lagona ai ma pe faafia ona faalogoina, ma le fesuisuia’i o lona malosi. Ua amata ona tatou talia ma faafeiloa’i lo tatou tulaga leiloa. O le malosi na fa’aalau i le galueaina o le faanoanoa ua toe maua

mai, ma ua tatou gafatia ai ona fetuutuuna’i i manaoga ma avanoa o le soifuaga fou ua sui i ai. Ua toe ea lēmū a’e, ua mafai ona toe taofi mai le faagutu ma toe pulea ma faatonutonu le soifuaga. O lenei faasologa laasaga e faitau masina e tupu ai, ma o le atoatoa o le toe faatulaga lelei ia maopoopo, mata e atoa se tausaga faato’ā tupu mai. Peitai ua folafola mai e le Atua, o le a tupu! O le a i ai, “*taimi e fofō ai...e ati a’e ai...e ‘ata’ata ai...e sivasiva ai...e feasogi...tausi ai.*”

(3) “*“o ona po e saili ai, ma ona po e tuu ai ua leiloa.”*

E faapefea ona tatou fesoasoani ia tatou fanau, ina ia latou iloa ona faatautaia tō’esega o le olaga? E tofu le tagata ma ana auala, a o se tasi lenei o faasologa e avea ma taiala: (1) ‘*Aua le manatu māmā i lo latou agavaa e feagai ma faanoanoaga.* E tele lava ina galoo, pe manatu faatauvaa tagata matutua, i lagona o le fanau i taimi o puapuagā ogaoga. E faamaoni ma loloto le tiga e iloa ma lagonaina e le fanau, e pei foi o le tagata matua; e tatau ona tatou amanaia ma faamaonia. (2) ‘*Aua le taumafai e ‘alofia le talanoaina o faanoanoaga pe a auai i latou.* O lo tatou taumafai e faaese i latou mai auga tupulaga matutua i faanoanoaga, o lo tatou teena foi lena o avanoa mo i latou e malamalamā atili ai i o latou faanoanoaga, o le faalauteleina o lo latou malamalamā i lea vaega tāua o le soifuaga, ma lagolago mai ai e faamafanafana. (3) *Ia faalototeleina i latou e faasoa o latou lagona faasino i o latou tō’esega/ māumau o le olaga.* A’oa’o i latou e sili atu le tāua o le moni/real nai lo le malosi, ma faamautinoia i ai e tāua ia te oe o latou lagona. O tamaiti laiti e tapulaa lo latou iloa o le uiga o le oti ma ona aafiaga o i latou. O tamaiti matutua ua latou iloa le uiga ma aafiaga o le oti, ma e tatau ona faamalosia i latou e talanoa ma fefaaasoaa’i o latou manatu. (4) *Ia tuu se avanoa mo latou uiga faaletagata taitoatasi.* O tatou uiga faaletagata/pesonality e iloa gofie ai a tatou tāga faanoanoa. O tamaiti faafoliga e manaomia so latou lava nofoaga. O tamaiti faaloloto e manaomia le faatalanoa i aga fesoota’i. O tamaiti vaivai e manaomia tagata matutua e malolosi i o latou si’omaga; o tamaiti malolosi e mafai ona latou vaaia i latou lava. (5) *Ia moni ma faigofie ona fesoottai ma i latou. Ia fa’aaogā gagana ma upu faigofie e malamalamā ai.* Pe afai e maliu le tamā, e mafai ona fesoottai i le fanau iti: “O lou tamā ua alu i le

lagi...ua alu i le aiga...o loo moe...ua malolo” O le talanoa i le oti o le i’uga o le soifuaga i le tino, o le gagana lea faale Tusi Paia, ma e faamalamalamā manino ai le uiga o le māumau/toesega, e mafai ai e le fanau ona fesili i mea e fia malamalamā atili ai. O le a manino ma a’oa’oina le fanau, o le a latou gafatia ona tauave tiga, ma malamalamā o le ola faavavau, o le tali silisili lea a le Atua, ma e i ai se aso o le a latou feiloai ma toe mafuta ai ma e pele ia i latou i le lagi. “²*E tele mea e nonofo ai i le maota o lo’u Tamā; ana leai, poi a ou fai atu ia te outou, ou te alu e sauni se mea e nonofo ai outou.* ³*Afai foi ou te alu ma sauni se mea nonofo ai outou, ou te toe sau, ou te talia foi outou ia faatasi ma a’u, ina ia i ai outou i le mea ou te i ai a’u.*” Ioa. 14.

LAVEA’IINA MAI TAGATA

“¹⁷*ma ou lavea’i ia te oe ai le nuu nei, atoa ma nuu ese, ou te auina atu ai nei oe.*” Galu. 26.

Na amata le galuega a Paulo ina ua ia feiloai ma Jesu i le ala i Tamaseko. I lena feiloaiga, na fetalai ai le Alii, “¹⁶*Tulai ia i luga o ou vae; auā o le mea lea ua faaali ai a’u ia te oe, ia tofia oe e fai ma auaua ma molimau i mea ua e vaaia, atoa ma mea e toe faaali ai a’u ia te oe...e faapupula i o latou mata, ia liliu mai mai le pouliuli i le malamalamā...*” A e le’i oo Paulo i se tulaga manuia o lana galuega tala’i, e ao ona lavea’iina o ia mai le fefe po o le popole i tagata. Tagata e aofia ai i latou sa latou iloa lelei o ia, ma isi latou te le’i iloa muamua o ia. E tatau ona fufulu mamā o ia mai le manatu sesē, na te mana’omia se faamaoniga mai ia te i latou nei. I se isi gagana, sa fetalai le Atua ia Paulo, ‘O oe ua na o se lafomeli. O nisi taimi e fiafia tagata i le meli e te auina atu, o nisi foi aso e leai. A e tatau lava ona lafo le meli. O le mea lea ou te faasaoloto mai oe i le fefe, ina ne’i lē taliaina oe, ma le manatu e manaomia so latou faamaoniga.’

O i ai se feau faapitoa na tuu atu e le Atua ia te oe? O e fefe ne’i ai ni mea sesē e te faia? E mautinoia le tele! O e popole ne’i faitioina oe? E lē misi le tele o le au faitau laulu! O le a muimuia oe i le tele o mafuaaga eseese! Peitai e te faamuamua le fai o le finagalo ma le poloaiga a le Atua ia te oe, ma tatalo ‘Le Alii e, laveai mai a’u mai le faafafia ma faamalie o tagata, ina ia ou faasoa atu ma tufa atu i ai le feau ua e tuuina mai ia te au.’ Ona fai pea lea o lau feau ua tuu atu e le Atua, aunoa ma le fefe pe popole!

O LE PEROFETA MULIMULI

(*O le Tala Faafagogo ua faaSamoaina mai le tusi, ‘The Last Oracle’, tusi e James Rollins*)

Sa le’i i ai se sagatonu faalemafaufau, ma sa iloa lelei o le tamaloa sa fai ma faatiga ulu, na maua atu i se tasi aso o tātā le laualuga o se ogalaau faasalalau, sa faauaea i le loka o lona lima. Na latou le’i iloa lana mea sa fai, po o le a foi le faailoilo na ia lafo ese atu, ma i le i’uga sa le’i i ai se afaina tele. Mo le saogalemu, na latou fai ai se taotoga e aveese ai le loka.

I vайасо e sosoo ai, na tupu tele le talitonu o Savina, o le ma’ema’e o le teineitiitii sa na o se fefe faa tamaitiitii i le malemo o le tamaloa. O le uma ai o le mataupu, na tuu atu ai loa le Amerika i le puipuiga a le vaega o le fale su’esu’e i Menagerie. Sa latou su’esu’eina le manatua o le mafaufau, ma o le maua ai o se tagata soifua faapenei, o se punaoa e lē tatau ona maumauina.

Sa nofo ai Savina a o fai le taotoga.

O mea na latou fai ia te ia...

O loo ia lagona pea le gatete.

A o lenei ua leai o ia – ua nimo faatasi ma le uso o Sasa, o loo ua leiloa foi. O le āle taalogea lea e ta’aaloi ai tamaiti nei?

Na te le’i iloa, ma o le tulaga tuai lea ua i ai ana tapenaga, sa le’i i ai sona taimi e faavasega ai.

“O lau faatonuga, lau afioga i le Taitai Sili?”

“Saili luga o le lauelele.”

“O le a ou aumaia taifau,” na pei o le pe’ a lona leo.

Na taofi tutū atu e Savina o ia. “E lē na o taifau.”

Na faatau tetē atu Porasakova i le tamaitai, o ona laumata faapūti i fesili. Peitai na ia iloa le mea o loo mana’omia e fia faataunu. “Lau afioga i le Taitai? E faapefea tamaiti?”

A e sa ia savali ese. O le taimi lenei o gaioiga faanatinati. Sa i ai pea isi ana tamaiti e toa sefulu. E lava ma totoe.

Na ia faamautū atu lana faatonuga. “Tatala uma ma pusi fe’ai.”

11.45 i le taeao.

Sa nofo Piota i le va o vae o Marata. O ona lima malolosi ma mafanafana na opopo ai o ia. Na te le’i fiafia pe a pa’i atu se tasi, a e na ia tuu pea ia te ia. O le manogi suamalie faa-laufanua o ona fulufulu na sasala faataamilo ia te ia. Na ia lagonaina le feula lemū o lana mānava, ma le tātā o lona fatu lapo’ a i lona ivitū. Na ia iloa ma masani ia Marata i lona olaga atoa. Ua na iloa lelei ona lima nei. O le mae’ a

ai o le ulua’i ta’otoga o Piota i lona lima tausaga, na aumaia ai o ia i lona potu.

Na ia manatua ona lima lapopo’ a. Na fefe ai o ia, peitai sa taoto ai o ia i le potu i le aso atoa, faalagolago lona ulu i le pito o le moega ma autilo atu ia te ia. Mulimuli ane, ona tuu atu lea o le isi ona lima i le lima o le manukī. O ona tamatama’ilima sa pei e sivasiva i luga o laina maanuminumi o ona mai’u’u fulialuga, ma le masalosalo. Na pulato’ a o ia ia te ia i ona mata lanu enaena lapopo’ a, sa susū ma sa ia malamalamalama foi. O ona tamatama’ilima uumi na fusi afifi ona tamatamailima.

Na ia iloa le uiga o le mea lena.

O se polōmisi.

O isi atonu latou te ta’aaloi faatasi, fetagisi i totonus o ona lima, nofonofo i le po atoa faatasi ma ia... a o Piota na iloa lelei le mea moni a tupu i lena taeao. Sa i ai mea lilo na o ia na te iloa. Ma o ana mea lilo, sa la’u faasoa ma teu.

I totonus o ona lima, na ia sisila atu ai i le vaomatua uiga ese. Sa faataga i latou i nisi taimi e o mai i luga nei ma se faia’oga, e tafafao ma feoa’i solo i le vaomatua, ma nofonofo ai i lona sāō ma le filemu. Peita’i sa tau faafefe pea ia Piota. Na musumusu atu le matagi i totonus o le vaomatua, toulu ifo ai lālā ma lau o laau. Na ia maitau ma iloa e i ai se mea o loo foufou mai.

Sa le’i pei o ia o lona tuafafine.

A e sa i ai lava nisi mea na ia iloa. Na ia faalagolago atili atu ia Marata, alu ese mai lau laau. Na faateteleina le saosaoa o le ta ta o lona fatu ao mou malie ese atu le lalolagi, vaganā ai lau laau. O felelei solo, tafetafea, sivasiva... tau faafefe...

Na tagitagi lemu atu Marata i lona taliga. O le a se mea ua tupu?

Na ia gatete i le fefe. O lona fatu sa i totonus o lona faaī, na tu’itu’i mai ai se lapataiga a o toulu ifo isi lau laau e tele. Na ia saili atu i avanoa o i totonus o lau laau. Na fai atu Konesetatino ia te ia, na te mafai ona fai le faatele i se taimi vave i lona ulu.

O numera taitasi e i ai sona foliga... e oo i le numera aupito telē, aupito umī o se foliga faatusa. Lona uiga pe a saili se tali, ou te vaai i le avanoa gaogao i le va o numera na e lua. O le avanoa foi e i ai lona foliga, fausia mai le tuaoi o numera e lua. Ma o lena foi avanoa, o se numera. Ma o le numera lena, e masani lava o le tali lena.

Sa le'i malamalama atoatoa Piota. Na te le'i mafai ona fai le numera pei o Konesetatino, pe saili tali o paso e pei o Kisika, pe mamao lana vaai e pei o lona tuafafine. Peitai na iloa lelei e Piota e leai se tasi na te mafai ona fai le mea na te mafaia.

E mafai ona ia faitauina fatu...soo se ituaiga fatu. Tetele ma itiiti.

Ma e i ai se mea o loo aga'i mai, o se mea e i ai se fatu pogisā pato'i ma galala i le fia 'ai.

Na su'e solo e Piota i lau laau to'ulu a o tu'itu'i faasamala lona fatu itiiti. Na ia faatumuina auaua'i le gaogao.

Na toulu ifo le afu i lona muāulu. O le lalolagi ua na o lau laau toulu ma gaogao pogisa i le va, taavilivili ma taamilomilo, o taumafai e pa'i mai ia te ia. I le mea mamao, na ia lagona atu ai Konesetatino o valaau mai lona igoa.

Na faafufusi le maopo o lima o Marata ia te ia – e lē ina ia puipui o ia mai isi, a o le taofi mau o ia mo lona saogalemu. Na ia iloa foi lona fatu.

E ao ona vaai i ai o ia.

E ao ona iloa e ia.

E i ai se mea o loo aga'i mai.

Na ia faatumu le avanoa gaogao i le vaitusi ma le ataata, i nifo ma le gū, i le palasi o vae i luga o le eelele malō.

Na ia vaaia le mea sa aga'i mai.

6 Setema, 12.05 afiafi.

48,000 futu i luga o le Vasa Kasapiana.

2 itula i le tu lauelele.

Na sisila atu Karai i fafo i le faamalama o le Pomepati Kolopu Eperese XRS. Na faasolo faanatinati le aso a o masau atu le vaalele tumaoti i le vanimonimo. A o faagasolo mai le faigamalaga, na oso a'e le la o le aso fou, i luga a'e o latou ulu, ma amata ona toe goto ifo i o latou tua. O le a latou tu lauelele i luga o asu, a o malaga i se saosaoa mata'utia. O le vaalele toe teuteuina na faameaalofa mai i le Sikima, e le pilionea na te faatupeina a'oa'oga tau vaalele o Raita Palani mo auaunaga sa fai i aso ua tuana'i. E toalua pailate na la'ua tuleia afi o le vaa ina ia taunu i Initia i le aoauli.

Na faliu ane Karai i le vaega o potopoto i autafa o le laulau tiki. Na ia tuu i ai se'i momoe mo le ono itula, a e vaaia pea le toatele o loo vaivai. O Kouasaki o loo faamoe pea lona nofoa ma taagulu ai i luga, e o faatasi ma le pa'ō o le afi o le vaa. Sa le'i faalavelave

i ai Karai. Latou te manaomia uma le tele o taimi e momoe ai.

Na o le pau le tagata sa le'i iloa sona vaivai, o le tamaitai o loo taula'i lana vaai i le faila o loo i ona luma; o le sui fou i la latou vaega toaitiiti. E poto faapitoa i su'esu'ega o gasegase ma faalētonu i neura ma fesootaiga o faalogona o tagata, e tutusa ma le atamai o Atipale Poleki, mata o le ala lea o le tofi mai e Penita o lenei sui o le Sikima e faaopoopo i le latou vaega.

O Dr. Sei Rosauro e umi teisi lava mai le umi masani, o ona foliga ma fausaga o se kinamonii sukalati suamalie, ma ona mata lanu ameta malosi sa feilafi i auro ma le atamai loloto. O lona lauulu gata i tau'au sa fusi i tua o ona foliga i le solosolo uliuli. Sa ia tautua i le fuāvaa eafosi, ma e tusa ma ona tusi faamaonia, sa mafai lava e ia ona pailate mai le latou vaa na o ia. Sa ia laei foi lona ofu toniga i luga, faatasi ma le fusipa'u uliuli lautele i luga a'e o le ofuvae kaki ma ona seevae pulumu.

E ui ina sa le'i galulue faatasi muamua Karai ma ia, a e pei lava sa la'ua feiloi ma Kouasaki. Na ia toe tepa faalua, ina ua la'a ane le tamaloa laulauā. Sa 'ata'ata Kouasaki, ma ofo atu ona foliga fiafia e faafeiloa'i, a e le'i oso i luga o le vaalele. A o a'e mulimuli atu o ia, sa ia toe tepa mai i tua ia Karai ma ona foliga e pei sa faapea atu, o le ā lana mea o fai iinei?

Ua tau fai malolo lana vaega, na mana'o Karai ina ia latou lautusi tutusa i le taimi e taunu ai i Initia, aemaise e faasino i le tagata o loo latou sauni e feiloi i ai. "Elisapeta, o le ā se mea e te iloa e uiga ia Dr. Eiteni Matasone? O le a le tulaga na galulue ai lou tamā ma lenei polofesa mai Mumupai?"

Na luelue lona ulu, tau puni lana māvava i lona lima, ona faapalenii lea o lana tioata i luga o le isu. "E tupuga mai Okosefoti. Sa a'oa'oina i le faasaikolosi ma le fisioli, faapitoa i auala o mafaufauga loloto ma uiga o le mafaufa. Sa i ai i Initia mo le tolu sefulu tausaga talu ai, i le su'esu'eina o tu ma aga faa tapuaiga o le ioka, ma talitonuga faamisiterio a le atunu." "O se ituaiga su'esu'ega e pei ona sa fai e lou tamā." Na lue atu le ulu o Elisapeta.

"E i ai lo'u iloa o le galuega a Matasone," na fai atu ai Rosauro ma le faate'iia. "E atamai, a e faaleogalua, o nisi o ona manatu ma talitonuga o loo fefinaua'i ma fesiligia. O ia se tasi o uluai su'esu'e na fautuaina le faa-palasaina o le fai'ai o le tagata, sa fesiligia i lena taimi, a o lenei ua faasolo lava ina talia."

“O le a le uiga o lena faa-palasaina?” na fesili atu ai Karai.

“Ia, e oo mai i nai tausaga talu ai, sa pipii pea le suesuega faaneuro i le manatu tuai faapea o le faiai o le tagata sa faauaea, e tofu vaega taitasi o le faiai ma lana ia matafaioi tasi. E tasi le nofoaga, tasi le tiute. Mo le lua sefulu tausaga talu ai, o le sini o le faaneuro o le sailiili ma faafanua, mea e fai e vaega taitasi o le faiai. Po o fea e tupuga mai ai le tautala, o fea e nafa ma le faalogo, o a neura e lagonaina ai le lima taumatau, po o le faatonutonuina o le paleni.”

Sa luelue le ulu o Karai.

“Peitai o lenei ua tatou malamalama e lē o faauaeaina le faiai, a o nei faafanua o le faiai e mafai ona fesuia’i, e mafai ona feliuliua’i. I nisi faaupuga, e faapalasa. O le tulaga fetafea’i solo o gaioiga faatino, o loo faamatala ai le toatele o ma’i i le tino gase e mafai ona toe malolosi ma toe gaioi vae ma lima, i le uma ai ona faaleagaina se vaega o latou faiai. E faauaea e le faiai o ia lava i autafa o le manu’ā.”

Na lue le ulu o Elisapeta. “Sa faalautele le suesuega a Dr. Matesone i fesootaiga ma le faiga faaioka. E ala atu i le mafai e nei ituaiga faiga faamisiterio ona faatonutonu lo latou lava malosi ma le fetafea’i o le toto, na ia taumafai ai e faailoa, o le faiai e le gata ina fesuisuia’i, a e mafai foi ona a’oa’oina ma koleni. O le palasa o le faiai e mafai ona fesuiai.”

Na faalagolago i tua Rosauro. “E tusa ai ma le telē o le avanoa e mafai ai ona pulea lenei faapalasa, ua i ai nei se lalolagi fou mo le au suesue faaneura. E faateleina le atamai, fesoasoani ina ia pupula tauaso, ia faalogo tutuli.”

Na toe manatua e Karai le mea sa maua i le ulupoo. O tutuli ua toe faalogo. O le mea na foliga mai o se meaafalogo faaeletoroni na totō ai.

Na fesili Karai ia Elisapeta, “Na fai atu Dr. Matesone i le taimi mulimuli na ia vaaia ai lou tamā?”

“Na fai mai le polofesa o le a ia ta’u maia isi mea, a e se’i muamua ona ia talanoa ma tagata na latou faafaigaluegaina lo’u tamā.”

“Faafaigaluegaina o ia?”

O Luka Ena, le sui mulimuli o le latou vaega, na tautala, o lana gagana faaleo Romani sa mafiaia i lona vaivai. “O le matou au aiga lena. Na matou faafaigaluegaina Dr. Poleki.”

Na faasaga atu Karai i le tamaloa. A e le’i tu laueele, na faamoemoe Karai e talanoa le sao o le au Kipisi i le tala o Dr. Poleki. E tele mea sa tuua e le’i taliina i le tuana’i ai o la latou solaaga mai le fale saogalemu.

E pei o le, aiseā na filifili ai Poleki e faafesootai Luka nai lo se isi tagata? Mata sa mafua mai i lona fefe? Pe sa manatu le polofesa na te lē talitonuina se isi tagata? Pe a iloilo lelei i le tuanai o lona tagatavaleina na mulimuli ane ai le masalomia atoa o ofisa o lona lava malo, atonu lava sa sa’o lelei Poleki.

“E faapefea ona e aafia ai ma le polofesa?” na fesili Karai.

“Na ia faafesootai mai i matou i le lua tausaga talu ai. Na ia mana’o e aoina atu ni faata’ita’iga o DNA mai nisi o tagata faapitoa o lo matou aiga. I latou sa faatinua le peni tukerina.”

“Le peni a?”

Na tali atu Kousalasaki mai lona faalalava ai i luga o lona nofoa. Ua uma lana taagulu, a o ona mata sa moeiini pea a o ia tautala mai. “Tukerina. Le valoia mai o manuia. Ua e iloa foi, le faiatuga o fegauiaiga i alofilima, o le pulato’ā i polo tioata, mea faapena.” Na luelue le ulu o Luka. “O le aganuu a o matou tagata, e mai seneturi anamuā, peitai sa le’i manaomia e Dr. Poleki se tasi na ia faatinua le hokani poro -l le togafiti sili.”

“Tagata tau faasesē,” na faaopoopo mai ai Kouasaki. “Le au fai togafiti pepelo.”

“Na iloa e Dr. Poleki sa i ai i latou i lo matou ituaiga, sa matou fa’aalalogia ona o lo latou tomai i lenei faatufugaga. O i latou scāseā maua. O koviani faamaoni. I latou sa i ai le meaalofa. O i latou na sa ia sailia.”

Na nofo sa’o a’e i luga Elisapeta. “E faapena le mea sa fai e lo’u tamā i le au fai ioka o Initia. Sa ia ave faataitaiga o latou tamaliaga, e saili ai mo ni āūga masani.”

Na manatua e Karai le auala na saili ai e le tamā o Elisapeta ni vaega lē lau maua o ioka ma misiterio sa faamaumauina, i latou na fa’alia le agavaa maualuga o faalogona ma lagona. O le au valoia faamanuiaga ma le au faiatuga o ioka mai le taimi mulimuli na ia vaaia ai lou tamā.”

Na lagaia ai le isi fesili i le mafaufau o Karai. “Aiseā na faafuase’i ai le sui mai su’esu’ega o ioka i le au Kipisi? O le a sona fesootaiga?”

Na pulato’ā atu Luka ia te ia peiseai ua faavalevalea. “O fea e te iloa na tupuga mai ai le ituaiga o Romani?”

O Karai lea ua oo mai i ai le lē mau manatu. Na te le’i silafia lelei ni tala e uiga i le ituaiga tagata feoa’i solo o Kipisi, sili ai lo latou tupuaga.

Na iloa atu e Luka lona faanenefu. “E lē toatele nisi latou te iloa lelei lo matou talaaga. Ina ua ulua’i ulufale

lo matou aiga i Europa, sa manatu le lalolagi o matou sa o mai i Aikupito. Na ia valuvalu le tua o lona alofilima i ona foliga. “Talu ai le uliuli o matou pa’u, uliuli o matou mata. Na ta’ua i matou aikupitoi po o Kupiti, mulimuli ane ua ta’ua i le upu Kipisi. E oo mai lata mai nei, e oo lava i o matou tagata sa lē mautinoa lo matou faasinomaga. Peitai o tagata atamamai i gagana, sa latou mauaina talu ai nei, o le laulaufaiva Romani e tupuga mai lona a’ā i le Sanasekarita.”

“Le gagana a Initia anamuā,” na fai atu ai Karai, i lona te’i, a e ua amata nei ona malamalamā i le fesootaiga.

“Na matou ea a’ē mai Initia. O le amaro paro i latou, le nuu moni o matou auga tamā. Initia i Matu, ina ia patino tonu, le itumalo o Punitapu.”

“A e aiseā na outou o ese mai ai?” na fesili ai Elisapeta. “E tusa ma lo’u malamalamā i lo outou tala faasolopito, na outou feagai ma taimi faigata i Europa.”

“Taimi faigata? Na matou feagai ma sauaga mata’utia, saili faatapito ma fasiotia.” Na ulufia e le afi lona leo. “Na matou feoti faitau selau o afe i lima o Siamani, na faamalosia e oofu i le Tafatolu Uliuli. Penegeseko niamaso!” O upu mulimuli na mautinoa lava o se upuvale ia Siamani.

Na tepe ese Elisapeta mai lona faavale malosi.

Na lūlū le ulu o Luka, ma tau faato’ā filemu o ia. “E lē tele ni tala o maua i uluai laasaga o lo matou tuana’i. E oo i tusitala ma faia’oga o le tala faasolopito latou te lē iloa tonu pe aiseā na tuua ai Initia e le au aiga. Mai faamaumauga tuai, ua matou iloa ai na sosola ese le auaiga Romani mai Initia i se taimi o le sefulu senituri, na latou pasia ma ui atu i Peresia tau atu i le emepaea o Paisanetiuma ma tala atu. Na faatama’ia matū sasa’ē o Initia i lena vaitaimi. E lē gata i lena, a o le taimi foi lena sa amata ai le olaga fai vasega i Initia. O i latou sa tuu ai i le pito i lalo, sa ta’ua o le au lē faavasegaina, na faailoga o tagata e lē pa’i i ai se isi. I latou e aofia ai le ‘au fao mea, au gaoi, fai musika, fitafita lē faamamaluina, faapea le au fai mea maneta, i latou sa i ai le agavaa a e ta’ua e faapaupau e tapuaiga a le nuu.”

“Le tou au koviani,” na fai atu ai Karai.

Na luelue le ulu o Luka. “O le olaga sa lē gafatia, lē saogalemu. Ona faapotopoto faatasi lea o le au lē faavasegaina ma fausia a latou lava vaega ma tuua Initia, aga’i i sasa’ē, mo nuu latou te talia i latou.”

Na ia tomumu ane ai ma le ita. “O loo matou saili pea.”

“Tatou toe foi mai ia Dr. Poleki,” na fai atu ai Karai, i le suiga o le talanoaga. “Na outou felagolagoma’i ma le polofesa i lana talosaga? Na outou tuuina atu ia te ia faataitaiga?”

“Na matou faia. O se totogi i le toto. E faafesuia’i ma lana fesoasoani.”

Na iloilo e Karai le tamaloa. “Fesoasoani i le faiga o le ā?”

Na toe pusa a’ē i luga lona leo. “E saili se mea na gaoia i se ala sauā mai ia te i matou. O le fatu o matou tagata. Matou te –”

Na oso faafuase’i le vaalele. Na felelei solo ipu malamalamā i luga, faapea ma Kouasaki. Na ia sese’ē ese mai lona palanikeke ma lona ‘e’ē i le te’i. O Karai, sa mau i le fusipa’u o lona nofoa, na ia lagonaina lona manava ua a’ē i lona fa’āī. Sa vave ona fai ifo le vaalele.

Na toe lagona atu le leo o le pailate i le sipika.

“Malilie i le faafuase’i lena. Fai sina mamafa o le ea i luma atu.”

Na gatete atoa le vaalele.

“Faamau lelei fusipa’u,” na faaaauai ai le kapeteni.

“O le a tuu outou i le laueelele i le isi itula. Ma, lau afioga i le Ta’ita’i Piesa, o loo i ai le valaaau mai le laueelele i le vaalele mo oe mai ia Faatonu Koloue. Lea laa pasi atu ia te oe.”

Na faasino atu e Karai i latou uma ia toe foi i o latou nofoa. O Kouasaki ua toe faasa’ō i luga lona nofoa ma faamau lona fusipa’u.

Na faalue mai Karai i lona nofoa, faaese mai le isi vaega, ave ese le telefoni mai lona nofoaga ma tuu i le taliga.

“O Taitai Piesa lea.”

“Karai, sa ou manatu e logo atu oe e tusa ma le sailiga a Lisa ma Malekoma na maua i le mea sa pipii i le ulupoo.”

A o faalogo atu Karai i le faatonu o faamatala mai mea tau eletone ma tagata e i ai uiga lē atoatoa ae atamamai, na ia pulato’ā atu i fafo ma le faamalama. Na ia vaai a o goto ifo le la i le itu i sasa’ē a o lele saosaoa le vaa i le itu i sisifo. Na ia vaaia le ata o le teine itiiti ma ona foliga itiiti, maaleale, mama. O le mea sili o loo saogalemu.

A e sa i ai se fesili na eneene atu pea ia Karai.

O i ai nisi e pei o ia, o loo i ai i fafo?

*(Malo le faitau, malo le onosai)
(Sosoo atu Sulu Samoa Mati 2023)*

OILATOUA MALILIU

VITOLINA AULA'I SAMAELI TIME 6/11/1939 – 26/11/2022 (83+0+21)

Salomo 128:1&5, “Amuia i latou uma o e matatau i le Alii, o e savavali i ona ala.....E faamanuia mai le Alii ia te oe mai Siona.. ona e iloa atu lea le manuia o Ierusalem i aso uma o lou olaga.”

O le faaamuia a le Atua i le tagata faatuatua. O le faaamuia i le tagata faamaoni, o le faaamuia i le tagata galue malosi ma faaaogā tatau lona ola mo le Atua. E fiafia le Atua i tagata faapea. E faamanuia i ai le Atua. Tagata e fiafia e galue ma ofoina atu lona malosi, e faaaogā tatau mo ana feau. O le a se faatauvaa, a o se iloa ma se malosi foi, e naunau e faaaogā mo le viiga o le Alii. O le faasinoga lena ma le olaga sa soifua ai lenei tina.

O Vitolina o le faletua o le tiakono ia Aulai Samaeli. Na soifua mai le Aso Gafua, 6 Novema 1939, na faaipoipo i laua i le tausaga e 1965, na faaetia ai foi lo la tofi tiakono. O ona matua o Gu Time o Saleaaumua ma Pelenatete o Luatuanuu. E toa 13 o la alo. Ma te lei maua mai se faamauga o lo la soifua auauna i tala atu. A e tusa ma le mau a le tina, o le faifeau o Uili Seaga FS na faaee ai lo la tofi tiakono. Na maliu i le Aso Toona'i, 26 Novema 2022, ua 83 tausaga ma aso e 21 le matua o lona soifua.

Ma te taunu mai i le amataga o le galuega i le ekalesia i Saleaaumua, o loo tu maualuga le soifua galue o Vitolina i totonu o le aulotu, aemaise lava i le faatautaiga o le mafutaga a tina. Faatasi ma isi tina ua fai i lagi le folauga sa latou taufetuli faatasi mai. Sa fai ma vaaiga, ma faamalosi'au mo le faifeau fou e le'i iloa ma se mea o le galuega aemaise lo'u toalua. O ia o se mea faigaluega aogā sa faaaogāina lelei e le Atua ana taleni i lana feau o le Tala lelei. Afai e toe tepe i tua se manatu i le amataga ma lo ma taunu mai, sa foliga lava o se galuega faigofie auā o i latou lava sa faafoefoeina le tele o vaega. Sa i o latou aao lava mea uma, o lo latou malosi sa toomaga i ai a o tau amata se auaunaga. O se tina sa iloga lona aogā ona o lona sao i le tauaveina o le tele o feau e le gata i le lotoifale o le ekalesia, a o fafo atu foi. Sa taulamua i le tele o fuafuaga, ma matilatila ai lana auaunaga, sa fesili i ai le mafutaga a tina, i sona finagalo i le tele o

taimi, sa tautua foi ma le lē faalogologo tiga. O ia mea uma, o fua lava o lana amio mata'u ma le alofa i le Atua. Sa atagia ai lona savali i ala e finagalo ai lona Matai. Ma ua le itiiti aso o lana auaunaga auā le atina'eina o le Talalelei. Ua fulitua mai le Tina, a ua silafaga le Matai i lona tautiga. Na ia faama'ite le matou A'oga Amata lea na faavaeina i le 2003. Ma o se tasi o faiaoga faavae o le Aoga, sa fiafia e galue e aunoa ma se taui, o lana lea fesoasoani i le tau fatufatua o lea atina'e taua. Sa taulamua, ma faamalosi'au i sailiga seleni a le mafutaga a tina, auā galuega fai a le aulotu. Na malaga i Amerika i le 2009/2010, toe taliu mai i le 2013 ina ua faauu lo la alo o Isamaeli Aula'i FS mai le Kolisi Faafafeau i Malua. 2016 na fulitua mai ai le tamā ia Aulai, ona ia faaauau mai ai lea o lo la tofi. E leai se mea e pa'ū pe faaletonu. Sa tautua pea ma faatino le galuega i le mea e gata ai lona malosi.

E lei mamao tele atu ona valaau le Atua ia Aula'i, ae matauina ua sui le tina, ua amata ona tau le auai i faatasiga ma mea e fai a le aulotu, seja oo lava ina faataotolia ua le toe maua lona malosi e pei ona sa i ai. E taliga fialogo i le tamaoaiga o lana faasoa, le tima'i le fautua, le tuualalo ma le faamalosi'au i taimi e mafuta ai. E musu e foi fua se asiastiaga a le aufaigaluega. Faafetai Tolina, ua e tau le taua lelei, ua iu ia te oe le tausinioga. Ua teuina mo oe le pale matagofie ua saunia e lo tatou Alii. E leai se faiva e asa ma se maumau, o le tagata foi, ua na o se auauna e faatauvaa, a e leai se mea e nenefu i le silafaga a le Atua, o la lava na te faaatoatoa mea uma.

O le tagata mata'u i le Atua, fai mai le fai Salomo, E faamanuia mai le Alii ia te oe mai Siona.. ona e iloa atu lea le manuia o Ierusalem i aso uma o lou olaga. Ua faamanatu mai pea le soifua o le tina i le fanau ma le aiga aemaise le nuu ma le Ekalesia. Ia fai ma viiga o le Atua lana osiga taulaga. Tofa tina. Faafetai tele mo le auaunaga. Manuia tele lau malaga. “*E toatele fafine e amio lelei i lato;a o oe ua faasilisiliina oe ia i latou uma..*” Faataoto 31:29 O ona toe sauniga, na faia i le Aso 19/12/2022, i le malumalu EFKS i Saleaaumua lava. Matagofie molimau o le tina na saunoa i ai le fanau, aemaise le Taitaifono o le Komiti a le Au Toeaina, susuga Asotasi Time (FT).

**Saunia: susuga Pati Vili FT,
EFKS Saleaaumua,
Mtg. LOTOFAGA LEPA ALEIPATA**

SIFALE UALOA PATEA
20/3/1948 – 18/12/2022 (74+8+29)

Salamo 46:1 & 2 “*O le Atua o lo tatou malu ia ma lo tatou malosi, e fai o ia ma fesoasoani silisili i puapuaga. O le mea lea tatou te le fefefe ai pe a faaliliuina le lalolagi, ma luluina mauga i totonu o le sami.*”

Ua avea upu o le pese lenei a le Fai Salamo e fai ma aotelega o se molimau i le soifua o lenei tina. *O le Atua o lo tatou malu ia ma lo tatou malosi, e fai o ia ma fesoasoani silisili i puapuaga.*

O se auauna sa ia te ia le meaalofa a le Atua o le faatuatua. O le tulaga lea sa molimauina i lenei tina, na feagai ma le tele o luitau ma fita o le ola nei. Auā o se vaega tele o lona soifua, sa feagai lava ma gasegase o le tino. E tele taimi sa saili matagi ai e lē gata o le maota gasegase i Apia a e sa faapena foi i Lalomanu, e tele foi taulasea sa saili fofō i ai ma autovaa mai foi, ona o le tulaga sa feagai ai ma ia. A e ui i ia fita e tele, sa lei maluelue ai lona faatuatua. E ui lava ina foliga ua lūlūina mauga ma fati auma peau o le vasa, sa taofi mau pea Keriso i lona loto. Sa fai le Atua ma ona malu, sa fai le Atua ma ona malosi. Sa saili ia Iesu lona mafanafana ma lona filemu.

O Sifale o le faletua o le tiakono ia Leala Ualoa. Na faaipoipo i laua i le Aso 11/12/1979. Na faaeetia lo la tofi tiakono i le aso 2 Aokuso 2016. O se tina e fiafia e galue ma faamaopoopo le galuega a le Atua. Sa tu malosi i le mafutaga a tina i la latou pitolaau faa sa’oao seja oo ina faaaogāina le tofa ia Leala i totonu o le eklesia e ala i lo la tofi tiakono, ma avea o se tasi o tina o le saofaiga i le atualuma a le mafutaga. O se tasi lea o faamalosi’au tele i le tamā ia Leala na faamaite ai lo la tofi tiakono e pei ona galulue ai i totonu o le aulotu.

O Sifale o se tina e vaivai gofie lona loto pe a oo ina tutupu ni luitau e matuā ogaoga tele o le ola e pei ona sa matauina, ina ua valaau le Atua i se tasi o la alo. E lei talia gofie e le tina lea tulaga ogaoga. Peitai sa taofi mau pea lona faatuatua, auā ua i aao o le Atua le asafine pele ua tuua le mafutaga.

Tele o taimi e oo atu ai ma asiasi ia Saifale, e faafeiloa’i mai lava i loimata, Talofa e i si ou tama, talofa e i si ou tina. O lana faatalofa lava lea e masani ai pe a feiloa’i atu i ai. E le mafai ona foi se asiasiga e aunoa ma se meaalofa na te foa’i.

E le o se aiga e malosi, pe maualuga so la tamaoiga, a e le mafai ona taofia ai lona fiafia e foa’i soo se mea ua mafai ona la maua ma le tamā mo le Atua.. Tasi lea faiaoga faavae o le matou aoga amata, a o maua foi si ona malosi. E leai ni totogi o nai tina nei, a e o latou ia sa asaina le gasū o le taeao ma atia’ e le aoga. Ua oo mai i le taimi nei, ua mautū mea uma. Ina ua faaletonu la matou galuega o le falesa ona o ni faafitauli na tulai mai i le 2006, sa tau saili solo ni seleni e faauma ai, ina ua leai se mea e tua i ai le eklesia. Tasi lenei tina matua sa malaga ai i aiasiga na faatautaia e le mafutaga a tina e tufaina ai tusi aisi i aulotu mo sina fesoasoani. E ui ina sa le faigofie, a e sa nanā lo latou māsiasi ona o le naunau e fia ofoina o le fesoasoani i le faafitauli ma le toatuga o le aulotu. O se tina e toofilemu ma loto maualalo, a e alofa i le Atua ma lana Talalelei.

E lei mafaufauina e le tamā ia Leala o le taimi lenei e valaau ai le Atua i le tina, na faate’ia loto foi le faigamalaga a Sifale, a e ui i lea, e leai lava se fai loto, fai pea le finagalo o le Atua Pule Aoao.

E faafetaia ai foi le tamā ma le nofoaalo i la latou galuega sa feagai ai a o faataotolia o ia. Lea lava ua tau la latou tausiga ina ua valaau le Atua, a o fai pea le galuega.

Faafetai Sifale, malo galue, faafetai alofa i le Atua ma lana galuega, e ala i le eklesia aemaise le faifeau ma le aiga. Faamagalo mai le faifeau ma lona toalua, i se mea na faaletonu i lo tatou va. Alu ia oe o loo faatali mai lou Matai. Manuia tele lau malaga. A ia faamafanafanaina le tamā ma le nofoaalo e le Atua auā o lona lava Alofa, ua ia umia ai pea le soifua ma lo tatou ola i ituaso ma taimi faigata tatou te fetaia’i. “*Auā e faamafanafanaina Siona e le Alii, e faamafanafanaina ana mea faatafunaina uma lava. Na te faia lona fanua lafulafuā e pei o Etena, ma lona alofa e pei o le faatoaga a le Alii, e maua ai le fiafia ma le olioli o le faafetai ma le leo o le pese.*” Isaia 51:3

O toe sauniga o Sifale na faia lava i le malumalu EFKS i Saleaaumua, i le Aso Tofī, 5 Ianuari 2023. Na molimau foi le tamā ia Leala ma le nofoaalo i le aoao tetele o mea lelei ma le matagofie o le soifua o lo latou tina a o mafuta. Ona lagomalu ai lea i lona maota i Saleaaumua lava.

*Saunia: susuga Pati Vili FT,
EFKS Saleaaumua,
Mtg. Lotofaga Lepa Aleipata*

FEIFILOI PASITALIA MANAIA

TIME

14/8/1935 – 14/9/2021 (86+1+1)

O se tasi o tina matua o le ekalesia, sa po le fala ma feula le i'u la, a o alofaiva fanau ma aiga aemaise foi le nuu ma le ekalesia, i feau ma galuega faagasolo. O ona matua o Gu Time o Saleaaumua ma Pelenatete o Luatuanuu. Na faaipoipo ia Manaia Leulusoo o Saleaaumua, ma e toa 7 o la alo. E tusa ma molimau a le fanau ma le aiga, o Pasitalia o se tagata e toaga ma galue malosi i so o se feau, i taimi o le talavou. Sa faaaogā tatau foi lona malosi auā sa tele lava ina nofo i le maota o le galuega ia Uili ma Letupu. Sa tautua ma galue ai, ma sa fai o ia ma fesoasoani tele i le faifeau ma lona faletua i taimi o lona malosi.

O se tina foi sa galue ma auauna i le Atua e ala i le ekalesia ma ona magāvai. Sa galue i le mafutaga a tina, sa tautua foi ma faaaogā lona soifua i le aufaipese. Ma te taunu mai i le galuega e toalua lava i la'ua ma se tasi o tina sa faamatua ai i totonu o le galuega faa-aufaipese. O se tagata ua masani ma le galuega aemaise lana tautua i le aufaigaluega faifeau. E le itiiti foi le sao o lenei tina i lo matou aiga, auā tasi lea tina sa nafa ma le fanau, sa fai ma tausi tama i le tele o taimi e moomia ai se fesoasoani, a o tau amata le galuega ma atia'e foi le aiga. E fiafia e faamaopoopo i soo se galuega ma soo se faamoemoe o le ekalesia. Peitai ua faasolo ina faafualeva le soifua ua le toe tutusa le malosi ua pōia gofie foi i gasegase o le tino, ma ua tele ai ina faataotolia ma fai le faiva o le tapuai tatalo a o alofaiva fanau ma aiga i feau ma galuega.

Na molimau le fanau i uiga tausaafia, loto alofā, ma le loto maualalo o lo latou tina. E le tautala so, a e i ai ona uiga faamisa pe a oo ina luiina e se tagata lona loto maualalo. Sa faapena foi ona faasoai mai le susuga i le taitaifono o le au Toeaina ia Asotasi Time i uiga lelei ma le tausaafia o le tuafafine. Na faataotolia le tina ma sii gasegase atu i le falemai i Lalomanu, na toe foi mai i lona aiga ona o tulaga faigata ua oo i ai ma ua siliga tali i seu se fesoasoani. Na valaau ai lava le Atua i le aso 14 Aokuso 2021, a o taoto o ia i lona aiga i Saleaaumua.

Na faia ona toe sauniga i le malumalu EFKS Saleaaumua i le aso 24 Setema 2021. Faafetai tele

tina, ua malie lau tautua ma ua le itiiti lou sao i le galuega a le Atua, ua tele foi soifua ua pa'i i ai lau auaunaga, foi laia le viiga i le Atua. “*Ua ou tau le ttau lelei, ua iu ia te a'u le tausinioga ua ou taofi le faatuatua*” 2 Timoteo 4:7. Ia manuia tele lau malaga.

***Saunia: susuga Pati Vili FT,
EFKS Saleaaumua,
Mtg. Lotofaga Lepa Aleipata***

GU ISAMAELEI ASOTASI TIME

2/3/1984 – 14/1/2022 (37+10+13)

O ona matua o le afioga Taitaifono o le Komiti Au Toeaina, susuga Asotasi Time FT ma le faletua ia Savaliga Time. Na faaipoipo ia Polataivao Sandra Taufau Iosefatu Semi Time i le aso 26 Mati 2010, e toa lua o la alo. E momoe ma manū e lē fati a e sau mala e atia'e. O mafaufauga foi o le fatu pese e faapea, *O la'u fuarosa e, la'u fua veloveta e, o la'u fua ua uimoto, ae le'i matale e.* Ua le ese lava lea ma le leo i Rama, ina ua tagitu'i Rasela ona o lana fanau ua fano ma faataafea. A e fai mai le toeaina o Iopu, na foaiina mai e le Alii, ua aveeseina e le Alii, ia faamanūina le suafa o le Alii.

O se tala faate'ia loto e lei talia gofie e aiga, o le nuu ma le ekalesia faapea foi paaga ma aumea mamae, aemaise lava i nai matua, ina ua logo mai le leo o le faavauvau i le aso 14 o Ianurai 2022. Talofa ia Gu Isamaeli o se tagata e malosi ma fiafia i taaloga pei o le lakapi na taalo ai mo lana kalapu i Vaiala. Na faataotolia, ma sii gasegase i Ulumootoutua ma iloa ai ni tulaga ogaoga o lona soifua maloloina.

Na sii i Aotearoa e saili ai ni togafitiga ona ua tulaga faaletonu lona malosi, e tusa ma se faaiuga mai le Matagaluega Soifua Maloloina. Talofa, ua siliga tali i seu se lavea'i mo le uso. E ausaga lē tu aao lava fuafuaga ma manatu o le tagata ma le finagalo o le Atua o Lē ana le pule aoao, o le Tupuga ma le Mataisau o mea uma, na te aumaia le ola, na te aveeseina foi e tusa ma lona finagalo.

O Gu Isamaeli na taiulu i ai la latou matafale ina ua tuua le malo e Gu Savali Time, o lē sa faasa'osa'o i

Io latou aiga i le tausaga e 2020. Sa matauina lona agaga mai i le aiga aemaise le fia tautua i le nuu, ina ua faaee i ai le suafa o le aiga. Sa laualuga i lona manatu lana tautua i le Atua, e ala i le ekalesia. Sa faatupu fiafia foi lona auai mai ma tuu mai lona tau'au i le galuega, auā e tele ana taleni ma agavaa e fesoasoani ai i le feau o le Tala Lelei ma lona atina'eina. E ui lava ina puupuu le taimi na mafuta ai ma le uso, a e tamaoaiga i mea lelei ma matagofie e viia ai le Atua. Ua togi lona sao taua i le fale fau tele o le aufaatuatua,

E ola finafinau tele i soo se mea aemaise i le itu tau aoaoga ma lona soifua galue. Na ulufale i le Iunivesite i Samoa, Fiti ma Ausetalia, ma toe taliu mai ai ma le manuia ma ona faailoga. O se tulaga maualuga foi na oo i ai le faaaogaina o le uso i totonu o le atunu, aemaise o tulaga tofi na ia ausia e ala i matagaluega ma faalapotopotoga sa tautua ai ma faaaogāina ai meaalofa a le Atua sa ia te ia (MNRE, SROS, STA, UNDP & APTC).

O le Aso Sa 13 Mati 2022 na momoli mai ai i Saleaaumua le sa o Gu Isamaeli, ma faia ai ona sauniga faaleaiga i le malumalu o le EFKS. O ona toe sauniga na faia i le Aso Gafua 14 Mati 2022. Sa faagaeitia loto molimau ma saafiafiga sa saunoa i ai le susuga i le Toeaina Faatonu ia Asotasi Time FT ma le Faletua aemaise foi le tina ia Sandra, o alofa molipō auā le atalii aemaise le tamā o le aiga, o le uso foi ma le tuagane ua amia e le Atua. Na maea ona toe sauniga ona momoli ai lea o lona sa i Vailele o loo lagomau ai nei.

“Ua fano le ua amiontu, a e leai se mafaufau i ai. Ua aveeseina foi tagata alolofa a ua leai se manatunatu ua aveeseina le ua amiontu ai le leaga.” Isaia 57:1

Ia manuia tele lau malaga Gu Isamaeli. Faafetai mo le auaunaga, malo saili malo mo aiga ma nuu, aemaise le Atua ma lona viiga..

**Saunia: susuga Pati Vili FT,
EFKS Saleaaumua,
Mtg. Lotofaga Lepa Aleipata.**


AUE! UA MALILIU TOA!

LUPE MONIKA TAVITA ANESONE - O le Faletua o le Toeaina Penisione, o Tavita Anesone FT. sa Taitaifono Komiti Au Toeaina. Sa galulue o ulua'i faifeau o le EFKS Alafua ina ua faavaeina i le 1970s. Na fanau o ia i le Aso Lua, 4 Setema 1951 a e maliu Aso Lulu 18 Ianuari 2023; ua 71 tausaga 4 masina 15 aso o lona soifua. O lona sauniga faaleaiga na faia i le aso 9 Fepuari, na ta'ita'iina e le susuga Victor Pouesi FS; a o le toe sauniga i le aso 10 Fepuari na taitai le Toeaina Faatonu Faleata, susuga Misipalauni Faatau FT, faaulufale e Faisiota FS, Tusi Paia na faitau e Pati Crichton FS, Lauga le Toeaina susuga Tautua Aurelio FT, talosaga na taitaiina e susuga Esekia Peneueta FS.


ANDREW LEAVASA FT - O le Toeaina Faatonu o le Matagaluega Amerika, a o le Faafeagaiga taulagi o le EFKS Vai o le Ola, Pulega Tutotonu. Na a'o'o'ina i le Kolisi St Josephs ma Hillary College Niu Sila. Na galue o se Malu o le Malo, ma se Su'etusi. O se alii taalo lakapi lauiloa, sa taalo i le au lakapi taitoafitu a le Manu Samoa i Honk Kong 1978 - 1981, kapeteni le Manu Samoa i le taaloga ma le Olopeleki Maori i le 1979. O ona tausaga i Malua 1993-1996, ma le Fuller Theological Seminary 1997-1998. Galulue ma le faletua ia Losi Leiato Leavasa i le EFKS Vai o le Ola, Lakewood, USA 1998 seia oo ina valaau mai lona Matai o loo faapea ona ia fai Lona finagalo ma Lana galuega. O ona toe sauniga sa faia i aso 25 - 27 Fepuari, o loo lagomau i Forest Lawn Cemetery, Long Beach, Amerika.

MOSE TANIELU FS - O le faafeagaiga a le EFKS Puleia, Failautusi o le Pulega Palauli, o le Matagaluega Faasaleleaga. Na maliu aso 11 Tesema 2022. Na galue i le Faletupe Atina'e a e le'i ulufale i Malua i le 1984, faaipoipo ma le faletua o Aliitasi i le amataga o le 1987 ma la'ua i'u mai ai i le faaiuga o lea tausaga. Na osi feagaiga ma le EFKS Puleia i le 1988, ua 34 tausaga o galulue.

FALEVI JR PETANA FS (14/10/63 - 4/1/23) O le faafeagaiga a le EFKS Maota, Pulega Palauli Matagaluega Faasaleleaga. Na maliu ina ua fai le ulua'i malologa. O lona sauniga faaleaiga sa faia i le EFKS Vaivase tai, a o lona toe sauniga sa faia i le malumalu o la laua Aulotu i Maota. Faamaise Atua i aiga ma le Ekalesia ona o lana aufaigaluega maliliu.



**VOTOLINA AULA'I
SAMAELI TIME**



SIFALE UALOA PATEA



**FEIFIROI PASITALIA
MANAIA TIME**



**GUI ISAMAELI ASOTASI
TIME**